


Bybel vir Kinders
bied aan

Petrus en die Krag van Gebed



Geskryf deur: Edward Hughes

Ge-illustreer: Janie Forest

Aangepas deur: Ruth Klassen

Vertaal deur: Gert Badenhorst

Vervaardig deur: Bible for Children
www.M1914.org

©2013 Bible for Children, Inc.

Lisensie: U het die reg om hierdie stories te kopieër en te druk maar u mag dit nie verkoop nie.



Die apostel Petrus
het deur die hele
land gereis om vir
ander van Jesus te
vertel. Eendag, toe
hy in Lidda was, het
hy 'n bedlêende man
teëgekom wat al agt
jaar verlam was.






"Jesus Christus
maak jou gesond,"
het Petrus gesê.
"Staan op en maak
jou bed op." Die
man het dadelik
opgestaan.



Mense wat dit
gesien het, het
hulle tot die
Here bekeer.



In die buurdorp, Joppe,
was mense hartseer. 'n
Christen-dame, met die
naam Dorkas, is pas
oorlede.



Haar vriende het
haar liggaam vir die
begrafnis voorberei
en in 'n bovertrek
neergelê, waar hulle
saam getreur het.



Maar Dorkas se
vriende het gehoor
Petrus was in die
omgewing. Hulle
het Petrus laat
roep om dadelik
Joppe toe te kom.



Toe hy in die bovertrek kom, het die weduwees hom die klere gewys wat Dorkas vir hulle gemaak het. Almal het gehuil.



Maar Petrus het hulle almal uitgestuur, neergekniel en gebid. Toe draai hy na die liggaam toe en sê: "Dorkas, staan op!" Sy het haar oë oopgemaak en toe sy vir Petrus sien, het sy regop gesit.





Hy het haar met sy hand help opstaan, die weduwees en ander gelowiges geroep en haar lewend voor hulle gebring. Die hele Joppe het hiervan gehoor en baie mense het tot geloof in die Here gekom.



Petrus het 'n geruime tyd in Joppe gebly,
in 'n huis by die see. Eendag het Petrus
na die dakstoep opgegaan om te bid.


As hy oor die
stadsmure kon kyk,




sou hy dalk drie
reisigers wat na
hom soek, sien
aankom het.



Hierdie mans was dienaars van 'n Romeinse kaptein met die naam Kornelius, 'n dienaar van God.



Kornelius het sy dienaars gestuur om Petrus te laat haal, omdat 'n engel in 'n visioen vir hom gesê het: "Laat haal vir Petrus.



Hy is tuis by Simon, 'n leerlooier, wat by die see woon. Hy sal vir jou sê wat jy moet doen."



Terwyl Petrus op die dakstoep gebid het, het God vir hom ook 'n visioen laat sien. Dit het gelyk of iemand 'n groot doek na die aarde toe laat afsak het.



Op die doek was diere en voëls. Petrus kon sien dat hulle "onrein" was. Dit beteken dat godsdienstige



Jode dit nie mag geëet het nie. Skielik hoor hy 'n stem vir hom sê: "Kom, Petrus, slag en eet!"




“Nooit nie, Here!” het Petrus geantwoord. “Ek het nog nooit iets geëet wat onheilig of onrein is nie.” Hy hoor toe weer 'n stem vir hom sê: “Wat God rein verklaar het, mag jy nie onrein ag nie.” Dit het drie keer gebeur, en daarna is die doek weer in die hemel opgetrek.



Petrus het nie verstaan wat die visioen beteken nie. Terwyl Petrus nog hieroor nagedink het, het God vir hom gesê dat drie mans na hom soek en dat hy saam met hulle moes gaan.



Toe die drie mans vir Petrus vertel dat 'n engel vir Kornelius beveel het om hom te laat haal, het Petrus beseef dat God hom lei. Die volgende dag is hy en ses vriende na Kornelius se huis toe.





Miskien, terwyl hy oppad was na Kornelius se huis, het Petrus begin verstaan dat God alle mense liefhet - en dat God wil hê alle nasies moet weet Jesus is die Redder van die wêreld. Toe Petrus dáár kom, het Kornelius eerbiedig voor hom neergekniel.



"Staan op! Ek is self ook maar net 'n mens," het Petrus vir Kornelius gesê. Toe sê hy vir al die mense in die huis: "Julle weet dat 'n Jood nie met iemand van 'n ander volk mag omgaan of by hom in die huis mag kom nie..."



"... maar God het vir my gewys dat ek geen mens as onheilig of onrein mag beskou nie."



Petrus het vir hierdie heidene (nie-Jode) vertel dat Jesus die Seun van God is wat aan die kruis gesterf en weer opgestaan het om die Verlosser van die wêreld te wees.



Toe het die Heilige Gees op hulle almal gekom en het hulle God begin prys. Petrus se ses Joodse vriende was verstom. Dit was soos Pinkster. Die gawe van die Heilige Gees is ook op die heidene uitgestort.



Toe het Petrus die nuweling wat in Jesus geglo het, gedoop.



Terug in Jerusalem het die Christene vir Petrus verwyd omdat hy heidene besoek het. Toe vertel Petrus vir hulle van die visioene wat hy en Kornelius tydens gebed ontvang het. Toe hulle dit hoor, was die Christene in Jerusalem tevrede. En hulle het God geprys omdat Hy die Christelike kerk gewys het dat sy liefde vir alle mense bedoel is.



Petrus en die Krag van Gebed

'n Storie uit God se woord, die Bybel,

soos gevind in

Handelinge 9-12

"Die lees van die Woord gee lig."

Psalms 119:130



Die Einde



Dié Bybelstorie vertel ons van ons wonderlike God
wat ons gemaak het en wat wil hê dat ons Hom sal leer ken.

God weet ons doen baie verkeerde dinge, Hy noem dit sonde. Die straf vir sonde is die dood, maar God het ons só lief dat Hy sy Seun, Jesus, gestuur het om vir ons sondes aan die kruis te kom sterf. Jesus het opgestaan uit die dood en opgevaar hemel toe! Wanneer jy in Jesus glo en Hom vra om al jou sondes te vergewe, sal Hy dit doen! Hy sal saam met jou stap deur die lewe, en jy sal vir altyd saam met Hom lewe!

As jy glo dat dit die waarheid is, sê dan die volgende vir God: Liewe Jesus, ek glo dat U God is en vir al my sondes kom sterf het en nou vir altyd lewe. Kom stap asseblief saam met my deur my lewe. Vergewe asseblief al my sondes, sodat ek 'n nuwe lewe kan hê en eendag vir altyd saam met U kan lewe. Help my om aan U gehoorsaam te wees en vir U te lewe, sodat ek u kind genoem kan word. Amen.

Lees die Bybel en praat elke dag met God! Johannes 3:16

